

鹿
裘
石
室
集

鹿裘石室集卷第一

宣城梅鼎

鼎字禹金著

同邑湯賓尹嘉賓訂

賦

遵南賦

有序

歲壬申秋九月余征于南蓋余齡冠矣行所
睹記多六代遺蹟可弔而歌謠其泰者足用
訓至相嬾而不還踵亦憯其多故焉周之鎬
豐今在斯矣顧詹之暇稍韻其事什伍竊放

昔人述行而賦遵南如其鴻麗闊達以怵德
頌勛則班揚張左之業非是賦本指余病未
能賦曰

余嬰世之弗豫兮瘁蒙昏而寡儔何緒采之委
錯兮褻溷濁而離憂洞中冥而延邊兮締詰符
于遠遊寅厥蓋而疊疊兮紹協思于舊京戒僕
夫以中夜兮肅嚴駕而晨征惟密親之臚疵而
怫鬱兮步楹軒以自虞相婦處之多吝兮勔作
氣于縣弧撰良辰而云猶兮遂躡屩而南徂鼉

祝軫于宛沚兮夕余濟于迺城遵大達而旋顧
兮望黃池之涔淫彼衆潤其攸同兮象景霽而
謐清時秋氣篤于萑葦兮欸緒風于素林路曼
曼而超邁兮旌搖搖而曲張躋青岑以登頓兮
存謝史之遺宮徑迴繹而窅阻兮宿莽翳而弗
陽委千秋于玄夜兮寄遙思于予鄉騎跼跼而
更御兮從徽徽而在後軫轉其道兮問膜功于
東晦歎大濩洋溢而羣飛兮宿腓草于畝首固
天菑之流行兮亦國家所代有豈藿食之能謀

兮願陳情于牧守引姑孰而胥眺兮相石城以
如環曰楚封之匪遐兮究南霸于造端領皇風
于東晉兮尚司馬之維翰蹠黃阜之峨峨兮介
凌歊其以軒討遺音于白紵兮譎志譽于龍山
愆處仲之逆祐兮弔蘇子之不咸昔戴威而滿
頭兮竟提禍以揮揮維長綃于牛渚兮聞水族
之多奇抑神鼎所未備兮孰燧厓而照之厥幽
明之永絕兮何所當而要期反予駕于長坂望
枯園而容裔陟葛陽之脩嶺考慈姥之故地形

嶇嶇而迤嶓外儻莽以優邁託鐘籠于其巔兮
得簫管之上器日晡靄其將下兮指新林以取
塗茂出輿而舒壘兮遂將車而入虛何纍纍之
相似兮無松楸以植塋匪京觀而若斯兮迺鬼
雄之孤墳昔島夷之狂戾兮數取羸于一伍短
兵接以當目躡余行而若舞馬就括而飲刃兮
化甲卒于原壑中自瘞而繚轉兮或益恤而永
乖願藏心于淵兮累軫慮以儻回蹇吾去此故
土兮偏何遲而歷茲尚由庚以舒筴兮涉長淮

之浩流啣秦金之沈隱兮虛厭勝于東游過新
亭而隕涕兮惜晉業之不邁結予轡于四望兮
且弭節乎石頭審虎踞之曲勢兮歎防禦之阻
脩臨段石之崖峒兮觀石碣而志功入三山而
郁郁兮何所建之偉鴻麥閭閻之千肆兮羅士
女于五方嘻噓氣而成雲兮市隧別而開通噫
衍流而般魄兮旣娛樂而且康孳貨殖以闡委
兮冠蓋鬱而霧集何豪游之充物兮設雄觀以
萬國被郊垆之四分兮當星紀于上極相承覽

以尸存兮恢眈眈其難悉率越城而喑嘍兮追
孫氏之所規蹈太初而容與兮放赤烏以委蛇
荒楚楚而莫蹟兮邈蓁蓁而無蹊昭石印之詩
妖兮安天塹之足恃亦懷土之厚固兮寧食水
而之歿胡詭命而豐淫兮尚聽咎而窒耳彼龍
游而渡江兮覆厥族而何埃發臺城之南端兮
爰思躡于嘉和越披香與五明兮聞靡麗之寔
多擢曜靈以中處兮列望僊其與璿儀備鬼工
而猶厲兮極人巧其靡加中又實之以要眇兮

二八射代而脩媚觴玉樹以行謠兮金承跌于
藁砌忽踪眇以徊遑兮疑乍虧而互蔽謂恢然
之嘉觀兮劇將以明得意逮天懟以霽怒兮地
未義而閱世子既擴長懷而遐眷兮復容與乎
壽宮載雲旗之冉冉兮肆路轂之彭彭布几筵
于下噉兮儼靈君之子降觀峻宇之猗鬢兮規
化城而特起紛膠盍于菴羅兮紆芴唐之玉卮
帝釋之容容而遙集兮祥河涌而輟水尋智囊
于支郎兮衍白麓之名理橋魔鬼其焉誣兮釋

大寶而殉之蔣骨青而歿神兮國將亡則聽之
繇未昌之二日兮讖泉行以九百臨高臺以獨
足兮火酣酣于城北歷六代之代行兮不畢輪
而易君豈據執之不預兮寔伊德之適馮天監
此下土兮篤淮甸而龍興靄震震而若奮兮
超采石以東南雖九隩其奄宅兮睠馴首于鎬
豐遺洛食于嗣聖兮因輓輅而跡關中順陰陽
以履極兮吹象形于紫微狹漢制而循周兮言
彬彬而庶幾雙闕立表以嶮嶮兮闢大夏而奠

維抗高門于閶闔兮右帶江以周池廓夷塗而
丹堊兮薜荔垣而桂衡重襲固以城平兮洞轆
轤兮其無垠增九筵之垝圯而博敞兮世緒綺
錯以綉綸辟衆星之拱極兮若燭陰之舒明宛
雄虹之繚紹兮交風雨以相承神靈協而環衛
兮固竝建而彌新佇景望而懽息兮遡鼎成于
軒帝大期集而升中兮肅鍾陵其永闕錮三泉
之已汰兮酌流水以約制慌金支其開闔兮倏
潛舉夫玉衣穆皇皇而假廟兮儼陟降以昭回

樂斯丘之委夷兮式序類于文謨保厥功于百
世兮睹河洛而締思詠美美以上陵兮濟覆舟
之在阿臨夸術之廣廣兮淒玄水之微波風焱
起于蘋末兮施白露于蒹葭邇吾道以北首兮
酌列帝之寢園椒塗穴于狐兔兮膺牧豎之祭
原昔千騎而從風兮鬼何窈窕而予前物有所
必至兮時有固然經川隰而周覽兮投翰其焉
可詳循徵祖于華林兮期再畬于半陽藉王謝
于烏衣兮諒溫尹之伐庸曲周生之匪貞兮印

卞氏之純忠邀三弄于清溪兮壯賭墅之捷淝
隱典午之淪胥兮疇斯人其焉依緬遐想于冶
城兮悠然安知其所襄倘秦淮而東直兮披郊
園之榛中屬雌蜺之連蜷兮信休文之所考字
康樂以其坊兮睇平原之舊墟放微志于山居
兮邈延竚于吾廬何明哲之寡咎兮由不密以
失身遙信譽于風菌兮遲寸晷于鶴音聲無翼
而蜚蜚兮不抹死于其頸予衷抑而茆薄兮非
脩短之足愍蝸蟾厲而沸秋兮霜旣零而木下

復改策南之郭兮祖蹟靈其在宇紛炳燿其蕭
兮神哉沛而鴻祐思媒勞而弗終兮引天闕以
流睇稽我武之肆狩兮茲承庥于游豫喬桓
桓而司馬兮選跋涉于天步睠河山之保界兮
擘帶礪其與盟撫魏鄂之不緒偉曹黔之仗勛
馮末照于容光兮道開天而軼賊名履高平而
顧問衆轂擊以成雲第宅繼以相望出清蹕而
若神日佯佯其諷議時耀首而膏脣甯疾歌以
牛下兮祭燭火之星難鴻遼遼其未央兮冀異

州之上賢輕微命于尚臬兮中抱憺而含隱有
此讎而啜泣兮神宇漠而棲憤援桂枝以招招
兮揚不流于東楚天地際而往復兮尚德載而
旣雨信服膺以修嫿兮何曾思其顓顓廓獨處
而不憚兮軫芸芸之盛年希階天而不恁兮予
胡爲乎此邦赧童觀于素朝兮誓將旋予舊疆
遡回風而反顧兮豈我心之則降亂曰天地升
降紛相襲兮修折之運焉可極兮習坎乘流與
時息兮君子于行其儀一兮其儀一兮南之征

古今

釋閔賦

有序

釋閔賦者予宅憂之明年而作是賦也蓋予
生時有異徵迨長而淹抑不善達卽古之人
三十五經通而予小子文質闕焉無所氏又
沾沾熹爲奇負俗之衆遑遑而是越予所自
出命于玄鳥先人而上世有紹明此以稱神
明之胙何云能後乎且予齡幾壯語曰行百
里者九十半日月何常恐來者之湮滅不見

也然徒閔閔而自傷何益迺故曼衍其辭以
釋之其辭曰

帝歆惠于高禩兮昨天乙之瀾漫已商丘而潰
潰兮遺滲淫于汝南伯耿介乃有服兮銷扈帶
而自封福逍遙以蟬蛻兮或獲其羽于冥鴻淑
洵改服于江左兮司馬遵美而譙豐肆藻繡于
都官兮予祖卜文脊而衍靈宗皇矯矯董道而
偉修兮臣 肅諫于燕京母親約且婉嫵兮始
作嬪而告興曰予寢神焱之擘燁于予室兮疏

察赫戲而輝煌暹彤雲之霍霽兮如織阿之遡
光如燭陰之銜照兮爇熒燼爛而彭彭玉女之
投壺而天嚙噓兮濯濩燐亂以彌章亦如建木
之無景兮登門熊熊而決揚倏怳惚而不見兮
遂有身而未明惟祝犛冠于作噩兮月畢陬而
爲陽貞焉逢之淹茂兮予乃謝閭闔而以降集
長虹以禕服兮糝予佩以芳澤操長劍之耿耿
兮冠青雲之岌岌揭予旌以招搖兮修予綦以
長列材薜荔以爲衣兮錯菌桂以爲藉予既有

此姱節兮哀桀梧而岐嶷唯昭質之媿媿兮纏
胡繩之陸離前蘭皋而稅駕兮望芳塘以躊躇
蹇予考之迫殂兮言瞻彼而失帖中海海而裹
鞠兮外皇皇而孺慕睫承泗之盤淫兮抽哀思
而若縈昔標擗而失寐兮旦恫慄其若矜予雖
疾世媿之忽顛越兮義不自詭以求聞續獵捷
其僮停兮芳菲菲發于幽昧芝房之菌蠢于培
塿兮紛莫考其爲瑞固翕絕以扶於兮傑池發
泮而繁會飄髮髮而翕習兮翩蕭騷而委寘鸞

鷲恐文之爲患兮逐鴝鳩而容與下桑榆而參
譚兮風在下而高舉何曾思之冥冥兮服敦忠
而靡佗肆要眇之偉觀兮及邃古之不波悵高
天而蹉跎兮內沉鷲而無何不自惜乎澀壽兮
余安忍衆之益訛僞紛綸其重性兮羌求範而
焉舍已矜滯澗與滌澗兮謂歸墟其如此要斥
鷄而比翼兮笑扶搖之九萬里驥伏櫪而中道
兮蹇金鉸而方軌日月忽其逾邁兮收恢急而
沈藏蘭瘡瘡于道傍兮棗莢棧骹而登堂夫土

囊之生陰風兮日晡暖其無光
擘馴轡而瞽亂兮知良時之弗將
世翹翹以竝進兮紛糾糾而狂攘
取荒榛以窘步兮避案衍于周行
精煙煙而滿心兮當之歿而愈明
隄詘詘而聊慮衷踈蹠而求索兮
競欲易予之耿素蝮蛇紛濟而膏
首兮於菟耽耽而躑躅窮奇駉駉
而據要津兮吾傷乎衆禽之無族
女丑蒙顛而來下兮魃堆侏侏而予
逐雕題齷齪而思擬人兮渾敦又腥
余之肉予誠服低徊而靡顏

今亦何樂乎有生外儒見而以平兮中坎廩而不自寧世欺猓而善虐兮曾不可乎與言若陽冰之乍合兮羌陰火之潛然名腊鼠其爲璞兮等月旦于車旃斥莘鼎于下庖兮羞鮑魚而登上筵信蛾眉其善淫兮而雙靡之爲妍麟拳跼而羈罽尉兮來何求于斯時也孰謂荼苦而無者兮紛甘之而如飴也足蹶蹶粵峯而若有循兮衷溘溘洄沅而自疑萬目睜矐而傍睨兮羌胡滃滃而泚泚波灩灩而沉瀆兮孰縣石而閔

之熒炎炎而焚天兮安東隰而戢之思聯聯而
靡極兮恐曼衍之無家慘周阿之步武兮鬱頰
頷而婆娑塊結膝而不吐兮惟伶俜而行歌聊
弛念而遐舉兮有所締于扶桑莫濯足于淵隅
今朝晞髮于若英登玄圃之曾城兮據瓊臺而
爲宮屑瑤蕊以爲糗兮餐沆瀣以爲糈望崦嵫
而駭矚兮釋玉虬乎閬風結予軫于昆吾兮爰
息其馬于悲泉過少皞于長留兮駕玄虬以容
與傀氏欲反景而享予兮藉三文之楚楚六龍

邁而不肯輟兮佩芳菲而延佇反予旆于丹丘
兮儵怳綽約而排雲采禽獸之純縞兮拾珠玕
之叢生銀臺玉宇之隱隱兮滉漾浸漶而網綸
驚幻變之熹微兮欲往從而無因忽焱散而不
見兮殷憤薄以屏營氣馮馮以逸騫兮越堂庭
而遊遨以三日而不食兮求祝餘于招搖躋星
鳥于鳥次兮燔炎火之揚爍乃承北戶之炎風
兮寤惻僚而不自宜迅予車之闐闐兮駛予馬
之駢駢命玄武使先道兮天駟承以驅馳望太

室之菴靄而益益兮姑純懿之所廬弔禹父于
墀渚兮謁泰逢于宜蘇將羅虺之攸宅兮寔惟
帝之密都深林宵以冥冥兮邈不見夫山圖入
激浦而儻徊兮迷不知吾所如潛懣懣而欲絕
兮故案志而不發悵幽谷之無鳥兮脰爲脟而
弗達知世覽之邈不盡兮遂流觀于海溼衍八
裔而地延兮望萬里之無際波匍匐潛漉而浮
空兮洞滌澗潏而爲勢鯨突厄瘞困泫而駕山
兮蜃呵嗽鬣鬣而成市予乃臨于中極之淵兮

沈珪璧而禮河宗
敝驪珠之照夜兮
麾龜龍以成梁
忽霍昱而不見兮
遺耳目之發皇
期盧敖與爲汗漫兮
戲九垓以回翔
戒庶靈其肅命兮
紛連翩以竝驚
鞭焚輪而上征兮
箕伯厲而霽
霧屏翳爲予清塵兮
望舒鳴鸞以警御
覲太乙之常居兮
饗鈞天于帝庭
稽定正于營室兮
考天樞于視金假
槍楛以迅掃兮
旋畢車于青林
攬封狼以威狐兮
伐河鼓之殷訇
下天潢而汎汎兮
妬帝女之嬪紛
予將從王僑而嬉
娛兮攝

六氣而遊八極挹陵陽之丹溜兮求倥傯之栢
實遇洪厓而就問兮謂予其非仙才嗟三山之
不可處兮空睇雲而遙思伊天池之無窮兮而
人命之不固懲服食之爲災兮五石奇而無遇
歲旋日而成歲兮日冉冉以爲度驩駢隱而無
崙兮憂糜興而成緒行屹屹而負俗兮原太白
之多虧豈沾沾之可爲兮恒恕已而自持慨雄
雞之鬣羽兮緣直木之先菑予旣自疑于慢藏
兮穆筵篲而端筮筮曰佗山之錯兮與璆爲仇

狼虎所宅兮爲我患憂忘跛失履兮之我從舟
明夷于飛兮垂其翼也君子于行兮亦不食也
火焚山兮云何戢也女從母兮亡以夕也大造
爲爐兮天地爲廬六氣爲馬兮萬物爲芻變無
定稽兮道無常都焉知禍而非福兮曷壽彭而
夭殤細與大其不可遴兮盈與虛而互張或陵
卵而化淵兮或生白而爲禎或胎于其似兮迺
驚惻于其名何不黔而城守兮孰穴處以爲茵
或胼胝于終北兮而或娛遊于化城啓生石而

偃生巢兮馬有角而尾無丁
鼃為鑿而腐生茵兮雞化臂而司晨
矇者失綺兮行焉所如
達人
大觀兮環中是居
勺瀝液于羣言兮行蕩蕩之
何衢修道稅以為馭兮叱孔老以為車
被金石以廣德兮流絃管而漱辭
反初服兮太息收佚豫兮汎瀾卜黃離兮
稟坎泰神情兮游恬夫予既不周于今之人兮予心亦寥廓而嬋媛
諄曰長袖善舞多財善賈去龍為蛇兮蛇為輔去羊而虎兮虎為鼠
歸兮歸兮我非斯人
對世獨處

辭

詹烈婦潘氏哀辭

有序

正德六載廣賊起西鈔樂安郊關不守民多
跳賊從關下執潘氏潘蓋邑太僕丞潘崇婦
也怒斥賊賊脅之刃卽舉身飲刃其長子迪
逐母于衛身蔽母則刃辱首矣潘益怒斥賊
不寘竟割其腹死蓋辛未六月也明年撫州
守陳請祠祀之汝南生曰夫持文墨議論莫
不有君子人者于質志可觀然緩急輒有以

爲解不自作其言此其人非嘗服麻采有概
于文義者也豈與匹夫匹婦之爲諒焉予從
太僕孫宣城令習其事如此象章故楚地因
效楚辭一章以虞神而載諸麗牲之石辭曰
蕙蒸兮椒漿彼美人兮西方居婉嫕兮清揚賴
不可以干兮中且有明蹇獨邁此凶閔兮天何
常偕子逝兮周章鼓逢逢兮填填席玉瑱兮疏
石蘭御文螭兮兩驂靈逍遙兮穆來旋

鹿裘石室集卷第一

終

鹿裘石室集卷第二

宣城梅鼎祚禹金著

詩

四言古

贈吳觀察蹇公汝循

有序

蹇氏蜀之清門開府公用經術起晉陽治行
第一督學齊魯叅藩事廼今手觀察使治兵
於吳云吳文學國也論者以五湖之間民有
輕心惟昔且然其被海帶江爲南畿輔地形

重矣文武吉甫萬邦爲憲則蹇公有焉夫春
秋行人類噉詩以見志逮於仲宣贈侯澹津
平原貽牧鄱陽猶多淵雅然四言豈以興
寄深遠如昔賢所稱哉予小子竊財其指而
爲贈蹇公詩

峻彼汶峨乃導于江展也忠定作义于邦以翼
我祖歷世在公清思維浩淑問攸同庥德鬯矣
穆如玄風

其二

奕世濩昌其儀有肅勗爾孫子允宜百祿旣惠
且飭以司宗祝改命于藩歷茲楚服楚服惟庸
則莫不穀

其三

股肱予郡使爲晉陽亦朱其紱冕而衣裳厥勳
時雍率彼有唐總齊羣后言覲于京康侯用錫
蕃庶是承

其四

泰山峩峩漸于東海高賢馮馮鬱惟仰止弼茲

庶士敬膺爾祉言如其醇言食其委克遵時憲
式瞻闕里

其五

登岱望吳白馬維翰敷教自東除戎而南昭假
嘉命好猷弗訾唐兮孔碩駢服旛旛族脩乃共
恍心以虔

其六

吳人憇亟宣淫有越變趨是矜靡言捷捷蹇侯
蒞止爰眎爾則羣慝載清滌濫罔佚粟惟淵哉

下民永殖

其七

矯矯鴻鵠以浮以軒翼若列星文美孔宣我思
非薄不敢相援日月經天亦臨于淵願托浮雲
庶爾高騫

其八

公徂在東德音時下聿來有吳
予望汝心乎不遐其室則邇
褰裳涉震三江之汜江有香草
以貽君子

訟詩貽沈子

有序

已卯春予與沈子君典感時撫事有悄悄之
憂因以自訟而竝貽之

福求自己禍固有端後車之覆宜鑒在前維罔
以魚鴻或麗之莫疾于舌駟不及追謂父則虎
謂兄則狼彼實齋怒逢之不祥鸛埵來兩蟻孔
潰隄睹始知已軫厥先幾深厲淺揭人亦有言
尸祝代庖孰任其讐多事所患孤貴失和一語
一嘿道在龍蛇女違予弼予闕女規母曰予聖

淑慎爾儀

五言古

擬古十首

悠悠遵往路依依念將離
一別萬餘里會面安可知
黃鵠命其儔北風胡馬嘶
逝水尚復返行雲有歸期
巾帶忽自緩沈憂中徘徊
願因撫清琴見君音與徽

其二

高樓出浮雲下有往來道
往來歲月長悠悠令

人老當軒望西北反顧傷我抱慷慨歌其兩白
日何杲杲紅顏坐自捐爲媚苦不蚤鴟鳩先余
鳴西園歇芳草

其三

極望何纍纍云是郭北墳悲風來蕭蕭白楊斧
爲薪故舊日以疎螻螿日以親牧豎相徘徊石
獸驕嶙峋縣縣卽長夜悵悵意不申昔爲百夫
特今爲萬鬼鄰雍門奮哀響涕下孟嘗君

其四

楚澤饒芳蘭采之不足手白露忽以溥悠悠感
物候踟躕望所歡所歡別已久馨香爲誰發三
年置懷袖

其五

招搖指西北茲歲率已殫廓落無與晤起步中
野間雙雙行命匹周周飲接翰感物念我友平
生有成言一舉戾青冥六翮不得攀在貴多遺
賤履危方企安南箕孰簸揚絡緯衣裳單

其六

孟冬天雨雪北方多苦寒攬衣帶先結曾冰積
巉巖轉蓬會飄風千里不顧還中夜夢故鄉躑
躑中道間遠夢難爲前遊子難爲顏

其七

白石何離離青松何瑟瑟與君相結髮中懷膠
與漆羅帷忽蕭蕭涼風一以及他人各有心賤
妾安察識僚慄私自憐若在遠行客欲君君不
知皎焉如白日

其八

命駕遠行邁邁彼太行問雨雪淒已厲詰屈馬
不旋谿谷多悲風墟里少人煙虎豹躐我後熊
羆啼我前稍稍去徒侶獨立良亦難欲濟無輕
舟欲歸絕故轅失路將如何引領摧肺肝

其九

今日高宴會吉日辰且良前有綠綺琴爲鼓一
再行一彈含白雪再彈中清商促絃理懷袖掩
抑有餘傷浮雲立不前洪波何湯湯此曲中復
置聽者起徬徨延頸四無人涕下霑衣裳

其十

冀言寫憂思總轡遊我園庭樹中銷落秋氣日以宣登高望所親道路阻且躑西北有征鴻嗷嗷向雲間我欲與俱逝媿此肅肅翰重陰翳反景縣車不復前非由托宵夢何以明古歡

秋懷

長夜何時旦起步庭南隅繁星衣中天微霜霑人裾蕭蕭嘉樹林朝榮夕爲枯天風西北來哀鴻與之俱感物再三歎搔首以踟躕四顧多悲

聲鳴琴聊自娛

雜詩

智愚無常稱妍蚩無定容名德貴易立顰笑賤
難工登高疾赴響所處固已崇流俗快斯須安
得察其終乃知鑿坏者千載揚清風

其二

吞舟碭失水羣螳坐制之白龍化魚服尺繳乃
見欺萬物各有極浮生安可知達者以俟命衆
人恃其私

雜感二十八首

忽忽中不憚駕言陟高丘
高丘臨四野湛湛長江流
豈不懷所歡欲濟無輕舟
佳期曠何許歲月倏已遒
蹟往旣非故撫來難豫謀
俛仰千秋間涕下不能收

其二

幽蘭在中谷字以大國香
惠風從東來微芬庶見揚
膏澤懼不周白日恹回光
非君誰識察迷陽升君堂
寧隨秋草萎不隨春卉芳

其三

東家有小女盛年處閨中容華自然理私謂姣
無雙韶莖應舉步羅紈揚春風孽衣上車去去
入君王宮後庭三千人一一蛾眉工爲顏不及
施爲驩不及終不願回王顧但願保王躬

其四

雙闕擢太清甲第羅四垂河漢經其間日月相
蔽虧前堂列鐘鼓後厨命鮮肥北里蕩奇舞丹
唇含素辭哀絃方潤耳躡履進所私壽客千黃

金白壁紹繞之輿臺既已飫狗馬厭厭遺歡樂
何有極各言保期頤

其五

茂林鳥多奇豪門士多良巾車各有適豈必遵
周行朝登冠軍宅夕依驃騎牆從橫成羽翼車
馬生輝光將身向他人含意誰見明女蘿施松
栢因長故得長蘭芷滫菘蕘雖芳故不芳

其六

灼灼彌子瑕啖殘迺見親矯駕謁臣母閹禁豈

得陳金屋貯阿嬌御輦班姬升珠玉紛咳唾桃
李萼陽春陽春難久居故者代以新一爲前魚
泣男歡不畢輪

其七

黃鵠不受羅天馬不受羈千里安所致四海將
何施亦已飽芻粟且復飲蘭池出一以踟躕入
一以徘徊金衣與汗血後代睹軼詩不見五鳳
間冠雀爭來儀

其八

羲輪發扶桑虞淵弭六龍圓景戒恆滿拙魄以
示冲如何夸毗子作意矜顏容步捷舉趾高顧
盼有餘工執極何不然人鬼且合從屋禽驕亦
淫氣焰若流虹脩途焉可竟天運亦有終

其九

余少秉微尚被服書與詩大雅久淪亾衆言紛
陸離時俗苦自媚顧謂文在茲獨往豈不力含
意當告誰亦有二三子攜手惠前綏四海一何
廣盼眎中心悲

其十

端居覽元化萬象紛盤紆白雲出蒼梧藹藹蔽
桑榆明星高駕動磬折各有如湯火日相煎至
寶委路衢豈不惜朱顏朱顏安久居蕩滌情與
志毋爲形所拘

其十一

東山散白雲不保五畝宅菽芾詠甘棠斧斤時
見迫積衰洵有基乘危易爲力覆巢豈完卵風
林少寧翼達者順自然儻來諒非一

其十二

海燕西方來雕梁托其端
差池若有媚主壽稱
萬年涼風忽東逝舊壘成棄捐
微禽一何知迺
與徂化遷北山有寒焰南山有溫泉
壹氣相蕩薄陰陽互爲權

其十三

周公輔孺子二叔乃流言
曾母豈不慈投杼三
至間嫌疑不可處骨肉多憂患
殉嚴面以決報
光肢以殘捐生非誠易知
仁民獨難男兒徒有

身四顧涕萑瀾

其十四

今日樂莫樂共言新相知明日清路塵對面生
九疑參商豈不親相見未有期箕畢各爲好安
能中與偕少年多遨遊及茲蚤旋歸

其十五

十襲祕燕石重滕寶驪珠爲謀懼弗周豈曰快
須臾屬質故相掩真賞違所需始意各爲媚詎
謂終見逾美惡無常家棄取非一塗以此希知

貴先民有良圖

其十六

西方貴無相老氏患有身金丹豈外襲蓮花自然生莊嚴假象教圖錄何繽紛旣築飛廉觀復埴化王城儒生堅墨守衆議不得申詩禮以發塚大盜非小人流俗驚紛葩率已離本根不見濁河水泠泠導崑崙

其十七

贈繳一爲施飛者不得翔逸足在中野下多罔

罟張高深安所托耳目爲徬徨獸蹄與鳥跡閔
然朔鴻荒

其十八

鵬飛怒其翼矯若垂天雲一舉九萬里扶搖徙
南冥斥鷃騰數仞蓬蒿相依因小大各有適攀
緣徒苦辛

其十九

具茨肅軒駕中道七聖迷乃逢襄野童順風再
拜之大隗實神人此亦稱天師蟻穴測水泉老

馬取道途在物有靈性足智故自愚

其二十

執彈來鳥雀翔集任所之捩食欲狎犬狺狺適
見疑列子驚五饋海鷗炳先幾純白道始載至
人貴希夷所以漢陰叟抱甕不言罷

其二十一

蜉蝣亦自矜衣裳何楚楚山雞顧其影將與靈
鳳伍朝濡夕則枯臨流理毛羽羽毛來罔羅有
翮焉得舉所苦不自知終以薦鼎俎

其二十二

金水有定性，園方有定形。祛長因握臂，故不如
裸程。君子美獨立，衆人貴同塵。飲酒被紈素，吾
以全吾生。

其二十三

吾徒豈龔生，惜哉夭天年。大雅明且哲，蠶室下
馬遷。單豹工養內，肢體不得全。華士恥爲臣，終
乃有其僞。智愚自一身，禍福無兩端。上有蒼蒼
天下有冥冥，冥泉。

其二十四

放民謂天放僂民謂天刑余中執兩端安能致
交伸箕潁薄堯德蒼梧竄其身鳳衰歌孔丘轍
環乃不停茹荼不言苦食蓼不言辛是非固多
岐人生難等倫

其二十五

中林有鷓鴣食椹懷我音爲音豈不好聽者多
苦心蒼鷹化蒙鳩佻巧終不馴君子防未然異
族非所親豢虎一失所耽耽欲齧人

其二十六

惠子書五車爲指多謬悠東壁略可紀羽陵未足周六家有同異恥與儒者謀講肆紛聚訟專門起相讎所以制字者鬼哭不得休

其二十七

廉吏而可爲其子常苦貧貪吏有餘財顧盼荆棘生賢哉二大夫高會抵千金廢興命也夫所寶遺令名

其二十八

三氣忽輪轉四大偶包承
僕蟲亦有長陰陽合
其精居者豈縣疣行者豈反真
遺生非所遺尊
生非所尊仲尼慟回路傲吏齊殤彭俱以有情
故墨墨兩無聞

送吳廷丞沈君典許汝臣北上

翔鳳振威采潛虬媚幽姿
萬里望寥廓安得並
駕馳物各遇其合亦顧性所宜
爾馬一以秣爾
輪一以脂悠哉歲云晏道遠霜雪滋
豈不戀儔
匹奮身赴前期縣弧志四方誰能日卑棲
煌煌

書文明下攬千仞輝飛沈聊以異金石諒不移
願言崇令德慰茲長相思

城東家圃侍大人散步作

駕言扶巾車逍遙城東隅山寒影墮水竹密翠
環渠鷄鳴乍破午望望野人居有畦可種豆有
圃可植蔬飛鳥去不極眠犢意自如旣已負名
郭况復邇吾廬荷篠日以涉斲菽親亦娛息足
暫釋耒臨流閒展書斗酒歸共勞微陽入柴墟
眷彼鹿門者千載情何殊

文昌臺同劉世宣叔姪命酌

春氣日夕佳悠然蕩人襟置酒臨高臺清飈生
竹林丹葩濯華錦芳條織玄金遠峯列僊掌飛
澗激瑤琴衆鳥相與還鮮鱗游以沈葵蕨適野
餐朋從多素心几席亂行次言笑雜篇吟鼯鼠
飲充腹鷓鴣鳴重陰一觴且陶泳四序憑因仍
此中有至味誰其存知音

昔游

有序

昔游者昔從家大夫游也予降于燕故其首

爲燕京次爲禹穴爲竇凌觀濤爲呂梁爲彭
城爲泰山爲望海爲孔林爲嶧山其年舞象
以前耳至如耳目所睹記則上會稽浮江淮
北涉汶泗鄉射鄒嶧觀孔子遺風亦竊識其
大者因感文考韻靈光之賦佮期追巫峽之
詠愴爾有懷而作是詩

皇昔覽揆予迺在古幽燕于時給事中戶外紛
輜輶土風何慨慷我生秉其全布衣頗任俠直
氣不可干及茲當總髮耿耿良獨難五湖多輕

心緬思易水間

其二

昔遊會稽山禹穴固已奇中有金簡書玄夷脊
厥司青玉承其裏雲霞紛離披芝檢祕靈異鴻
圖鬱文思水土導神功千載式爲期有能紹明
世意者其在斯

其三

昔者遊廣陵乘秋觀水力乘秋水力高怒濤似
山立駕軼驅羣龍涵蕩浮四極窮津肆衍漫決

岸何漂疾日母神所歸冥莫竟焉測卹然駭予
目言念若在卽睠此平生觀淫滯猶起色

其四

昔予游呂梁遡波望縣水奔騰三十仞流沫四
十里何者一丈夫被髮出其裏少小貴奇聞浩
蕩深自喜自非達人觀焉能識察此

其五

昔我游彭城顧見歌風臺脫身亭長去歸驅萬
乘來孰云乃天授風伯代爲災叱咤僵漢尸睢

水鬱崔嵬其事雖不立英雄有餘哀龍文亦曼
理亾碭生飛埃偶成豎子名是非安所裁

其六

昔予從考邁敬謁太山君雲霞隱丹闕海日蕩
杳冥玉丸攝真氣金芝流素英登封七十二一
一如平生至今骨若蛻脩然出埃塵東望往從
之梁父高嶙峋願言隨羣后造止太微庭

其七

昔游東海濱北陰成大觀鴻濤際萬里歸墟注

百川殊響若崩雷險介勢窮天巨鼇噴波來顧
見三神山屬望近若迎卽之不可攀一氣自出
沒汗漫誰能權念與若士期竦身立雲間

其八

昔涉汶泗鄉講業齊魯間伏軾孔子廬壞壁探
遺編絲竹儼在堂禮器猶森然惟馨薦明德駿
奔肅且虔餘風緬流緒一一爲相宣童子六七
人詠歸復來旋太山雖謂頽仰止獨不騫

其九

昔登鄒嶧山徘徊覽秦碑頌德浩且廣嘉觀臨
無涯六國方薦食英武震四垂周游撫東極金
石著令儀大義咸有經諸產亦得宜餘威既已
殫沈壁出鎬池之罍與梁父相望鬱崔嵬

魏國西園賦得公讌詩

今日良宴會竝坐君子堂涼陰疎百卉清氣羃
羣芳明星出脩夜三五從復橫月魄鬱爲規朱
燈耿成行總帷披雞棲曲渚峻魚防肅肅嘉樹
林流颺間笙簧飛蓋際璿霄濬顏出蘭房進酒

旨且馨觴行浩無方綺麗平生觀幻妙焉可忘
放蕩極情志已無歌太康

贈南大司馬麻城劉公

江湘鬱奇觀激頑多遠風顧瞻清朝彥六翮排
虛空卿雲惠優渥湛露浥青蔥高廣握權命卑
厚代有終嶢闕表閭闔舊京登鎬豐羽林十萬
衆坐專節制雄謀略有先聲無事待卽戎忠貞
攄故常精義肅將同願保金石軀千載垂勛庸
贈少宗伯聞喜裴公

長離本鳳雛芝房生幽芬嶠雲夙繁會列羽戾
高冥晉公信時喆華胄衍神明譽髦旣駿發招
納齒羣英純約廣物譽蘭臺鬱繽紛敷奏引清
言陳對究平生末塗會幽邈際世幸休明披阻
蕩懷素排霧領青衿臯契與夷夔何患不合并

少司寇金谿吳公署集

吳公初宰余
邑善家大夫

顯蒙念予穉側身忝嘉招屬和各言同名位一
何遼女蘿誠細微附彼百尺標昔宰得民和永
言視不恍今者告祥刑肺石有餘謠惟皇厠微

眷何啻金石交予生世不逢童觀在素朝更端
侍君子託命寔已邵茂館列芳樹油雲汎蘭茗
玄醴溢金罍杯行迅靈飈合坐發清聽嘉樂管
與簫緬思古人跡茲義信非遙

里兩生詩

袁生鶴聲

袁生古遺狂高矚薄玄旻其口多微辭荒宴託
沈冥臨池擅墨妙遠意形丹青世俗多轍跡進
退如有循生也處其間一癡復一醒禮豈爲我

設謠詠非所懲示余爾汝交千秋彌孔情

沈生懋學

沈生似淪跡本自青雲姿少小燕趙游起從屠
沽兒鬪雞注金距走馬飾金羈結納信所愛賢
用苦不遺酒家多餘負十千仍一揮慷慨攄情
素託喻在聲詩迕俗任流議不得顧其私鴻鵠
亦有志鵠鳩安用知

雨夜詠懷

雨足森廣野水衣交前庭泚泚北風發絲絲寒

節升羲輪不停馭四序相因仍蘭膏粲遙夕重
袞淒薄冰抱景息巖阿徂年綜典文相馬皆舉
肥壯士乃苦貧游魚泳曾波翔鴻薄青冥至人
無窮迹於物豈滯凝涉世謝雅步撫己以屏營
歲晏勉良圖崇善如丘陵

贈臨川湯義少

豫章本嘉木乃在南山阿擢穎率已異托命良
匪它風雷相盪薄嚴霜凝其柯其勢上千雲九
淵根下蟠絜圍羸百尺端勁示安儀旣爲地所

固而復時有嘉衆構一以集明堂鬱嵯峨匠石
不我顧委之沈泥沙器大苦難用分乖適不華
繩墨中自諧安能趨羣邪所虞在爨下斤斧或
見加樸楸彼不任漂搖起長嗟願子葆貞素終
以棟王家

績溪別鄺簿琥

下馬問故人故人猶在斯案牘手不停鞭笞心
不怡代耕需微祿乃爲取酒資何官不可免婆
娑且一枝少長各有役去去復焉之轉蓬隨飄

風安知終所期

黃山登軒轅峯望白龍潭慨然興懷黃帝
升遐之事

神臯標地紀奧壤接天真昔者軒轅氏鍊道師
至人枚卜薄九州翹跡于此升羣龍前引仗六
駕高排雲珠函披紺霞綵幢搖華星其人雖已
往千載徵靈文芝檢時自閔丹爐曜晶熒縣泉
漱哀玉下匯爲龍津幽森臨萬仞立壁如削成
是時春仲交謾謾松風鳴空中一蕩拂廣樂張

洞庭至理非外獎真賞固在襟撫觀八紘外遺
俗眇獨征

詠古三首答陳府君

嚴君平

益我損我神生我殺我身此理誰識察矯矯嚴
君平問言若有諷卜肆托沈冥云何益州牧從
事以及君堯舜相爲理巢許不得臣聃也實吾
師玄德撰其真雄也稱吾弟鄙哉乃美新

任季卿

漢江一衣帶乃有任季卿鳳舉衆鳥歸理生托
麟經使君從東來具駕謁其庭拔薤擊彊宗開
門卹孤嬰君子美廉白盂水置前楹勗哉事斯
語苕苕播清塵賤者非盡鄙貴者勿相輕

龐公

鴻鵠巢高林鼃鼃穴深淵所以龐公者躬耕峴
山田籍甚劉荆州相與隴上言愴怳如有失驅
車不能前至今傳耆舊猶在鹿門間

游山門諸洞

漫游平生驪雲岩况所慕昧爽戒鳴鑣徊環遵
仄路夾岸秋澄陰長薄寒綴露峩峩文脊峰冥
冥入煙霧逶迤百里間婉變接指顧奔峽忽中
拆城闔宛如故疑闢巨靈斧嶮絕詎能度秀異
自昔昭洞宇茲焉聚遙遙紫霄齊皜皜朝陽昫
餘霞明錦湍迅雷飛瀑布矚遠思彌清臨危神
且怖眷彼瞿矧生誅茅此岩住碧煙生丹爐石
牀倚瑤柱綠字闕空函玄精森何處去者不可
追來者亦聊寓我行屆季秋嚴霜戀枯樹天風

颯颯鳴悠哉日云暮冷然清嘯聞晚鐘逐歸步
林靄鬱蒼茫撫景一延注

春仲侍家大夫游白嶽

尚平游五嶽盧敖歷四極胡彼塵中人營營嗟
未息白岳亦靈區而且在鄉國有足不西馳眷
言勞夢憶予懷出世蹤幽討弱齡得安能事醯
雞甕中跼雙翼凌晨戒前綏肅駕天門側浩歌
清籟鳴萬象盤胸臆春風長金芝爲開太古色
采采以壽親鴻庥荷帝德

郡三良詩 有序

少參與家大父同鄉薦太常東平同舍生此
予小子所稱父執者也其人竝學古行高先
後從游典刑具在丁丑春因構東平無祿追
念兩公不勝殄瘁之懷私各播其事爲郡三
良詩焉

太常少卿周公怡

太常何矯矯禁闈始周旋志欲排闥闔虎豹下
九關白晝紛輪威狂狴歷諸躋庶幾及朝聞荷

校授遺編癸生不自衛孤根托皇天天怒豈有
常災祥乃顧讐一朝及在宥放歸田南山矯跡
忽再升後命不待年諸疏載鼎彝萬古備神姦

廣西叅議沈公寵

大國有巨木亦復多賢士家皇旣龍奮吳興仍
鳳跼迺我柱後冠危言動朝市王靈遂改加弓
旌復南指蘭臺多雄風蒼梧白雲起命駕早來
旋流觀在江汜時俗率故常何由邁君子

東平知州貢公安國

東平儒者流營道志不隳既絕尼父編復下董
生帷達轍窮幽曖七聖所共迷莽蒼盼睠間片
言識其幾遊宦雖不達微志獲有施名世豈必
多郡邑有餘師躑躅流俗間厚終以全歸

蕪江關別龍氏

北風吹飛藿倏忽并與離相締殊形影安得惜
解攜仰見雙秋鴻西來鳴何悲一從高旻舉一
從枉渚栖行者浩無端居者眇若遺

其二

冠蓋羅中衢高視以闊步何意千秋權俛仰在
韋布朱顏豈誠妍回君一再顧投分多所欽婉
變慙其素物化遞乘新人情不厭故

其三

亭亭百尺松兔絲相依因桃李雖無言華悴成
衰榮與子結終始此義期不磷兩分旣以展致
用有交申鼎鼎百年內貴賤何關人

其四

白日麗斯干涼飈蕩廣陌生別古所難以茲常

惻惻炙簧理故歡歡沈中響絕阻深歎河廣銜
情歷舊國微躬敬不遺庶以副明德

贈伯氏子登北上

子真曰僊尉漢廷聞引裾矯哉尚書公靈州帝
稱奇宛陵振鴻響大雅云在斯余父扣天閭玄
璫耀英儀念彼良弓子猶恥不爲箕握化豈無
術道阻何繇施丕茲奕世烈匪兄誰當追捷足
邁流電千里吾家駒峨峨燕昭臺望望天北涯
縣金構駿骨河清際良時致身青雲端祖德一

以輝努力事功名慷慨輕此離維厥善爲寶眷
言詒燕詩

贈陳師赴春官

睠子粵髻髻韋編授絳帷色笑匪伊怒械樸良
不遺千金享敝帚曰文未喪斯蹇茲弱以冠慙
彼一顧私所以瑰瑋士脫穎見其奇結藻擬黃
竹振駕攬瑤池萬物睹聖作彈冠會昌期商霖
瀾八紘陽春被四維燦焉周道興安事夢寐爲
用之我與爾惻惻賢哉回

鹿裘石室集卷第二

終